



E jere une volte, su la culine di Buri, la classe 1eB che e steve fasint furlan.

Di colp, la scuele e tache a tremâ e il pin bocognon che al jere tal curtîl, plen di ruiis, al cole fracassant i barcons de classe.

Ducj i fruts si platin sot i bancs e cuant che a vegnin fûr a viodin il prof distirât, sanganât, sclîçât dai veris e dal arbul. Plens di pôre, i fruts a sberlin e a verzin la puarte par scjampâ, ma al è fûc dapardut. Terorizâts, si cjalin ator e a tachin a cori ator come moscjis.

Chiara, dordule come simpri, si inçopede e colant e scuvierç une buse tal pavement che prime e jere taponade dal armâr.

Spaurîts da li sflamis, un daûr chel altri, i fruts a saltin dentri la buse. A sbrissin jù par un tunel e si cjatin tal prât di Vile Florio, dome che dut al jere fat di dolçs.

Lis fueis di zucur, la fontane di cjocolate, lis pomis carameladis, lis cisis di gjelato.

Nancje rivade, dute la classe e veve tacât a mangjâ: Maila e mastiave un clap di meringhe, Teresa e lecave un morâr rosa e blu caramelât e Tommaso si jere tufât te fontane di cjocolate.

Di colp i fruts a sintin a baiâ e un cjan di marzapan ju vise che al sta rivant cualchidun.

In chel a viodin rivâ ors gomôs bocognons e di ducj i colôrs. Spaurîts, chei de 1eB si platin daûr des cisis di gjelato.

Ducj mancûl Tommaso, che cul cjâf sot de cjocolate nol veve sintût nuie.

Un ors, cussì, lu cjape pal copin, lu tire sù e lu puarte intune pereson fate di mandolât.

I fruts, preocupâts, a comencin a discuti par decidi cemût salvâ il lôr amì, cuant che di daûr dai arbui al salte fûr un fantat ciçon e cence dincj.

«Mandi... ma tu cui sêstu?» al domande subit Dario.

«No fai cui che o foi, ma o fai cemût che voialtris o podêf liberâ il vueftri amì!»

«Disinus! In cambio ti puartìn cun nô tal nestri mont».

«O fcugnîf preparâ un plat falât par dâlu ai orf».

«Falât? Ce vulie dî?» e domande Arianna.

«Ma no falât, al intindeve dî salât! No ise vere?» al sclaris Dario.

«Fî» al rispuint chel altri.

«E cumò ce fasino?» e domande Arianna.

«O podaressin fâ l'esperiment di sciencis che o vevin di fâ a scuele», al propon Fiorello.

«Ma... a vino ducj i ingredients?»

«Ben, jo o varès le farine».

«E jo ai il panin cu la luianie».

«E jo lu ai cul formadi!»

«E jo vuê matine o ai cjapât sù cuatri fueis di salvie».

Insome, a vevin dute la robe che e coventave par cusinâ la polente cuinçade!

«Sì, ma... cemût le fasino?» e domande Sofia.

«Lu sai jo!» e rispuint Elisa, che e veve la mari coghe. «Bisugne messedâ intune padiele le farine e il lat, meti un strât di polente intun plat font, onzi cu la spongje e sfruçonâ parsore le luianie, il formadi e la salvie».

«E vonde cussì?»

«No, e indenant cussì cun plui strâts».

E di bot e sclop il plat al jere pront.

Cussì i fruts de 1eB a puartin ai ors chê bontât, e chei le mangjin di gust.

I ors a tornin Tommaso, sporc di cjocolate ma vîf, e in cambi de ricete de polente i mostrin cemût tornâ a scuele, tal lôr mont.

A pene tornâts in classe, il prof di furlan al veve sberlât: «Dulà sêso stâts!? Cjalait che us met la note sul regjistro a ducj e disenûf!»

«Ma nô o sin in disevot!»

E pûr intun banc tal cjanton de classe al jere un frut gnûf, ciçon e cence dincj...

Classe 1^B

***Buzzi Maila, Caporale Chiara, Cernuseli Carla,
Collini Chiara, De Carlo Chiara, Grattoni Elisa,
Maruzzella Dario, Mattiussi Sofia, Murati Fiorello,
Nido Elisa, Paravano Tommaso, Perdomo Espina Arianna T.,
Tognon Teresa, Zorzenone Martina, Zuccolo Arianna***

#227